



Bastiment du Temple en Ierusalem.

SALOMON estant Roy paisible des douze lignées d'Israël, ordonna de son estat, en sorte que tout fut réglé par la sâpience que Dieu luy auoit donnée. Il commit ses Preuosts & Gouverneurs, pour auoir égard sur les lieux & villes qu'ils auoient en charge. Aussi estoit Salomon tant aimé de tous les Rois circonuoisins, que chacun d'eux luy offroit des presens precieux. Et entr'autres Hiram Roy de Tir luy enuoya du bois de cedre du Liban, pour edifier le Temple que son pere Dauid viuant auoit ordonné estre fait en Ierusalem. Ce qui fut executé par vn nombre infiny d'excellens ouuriers qui y aborderent de toutes parts, en sorte que l'an quatre cens octante apres l'issuë d'Israël de la terre d'Egypte, & quatriéme du regne de Salomon fut commencé ce somptueux edifice, qui eut ses mesures de hauteur & largeur, son oratoire, le porche, le plancher & paruis, le tout selon l'ordonnance que Salomon auoit designée aux Architectes & ouuriers, qui fut par eux obseruée avec toute diligence, iusques à sa perfection. Auquel selon l'ordonnance de Moysé fut aussi mis le grand Chandelier d'or, les cuues, & autres vaisseaux ordonnez au laument & ceremonie pour le seruice du Seigneur.